



Kat Komp.
40573

I

Mag. St. Dr.

P

Paulo.


Teot. 3238.

Canonisatio B. Vincentii a Paulo.

Cracoviae typ. Univ. (1738)

IV. 3. 35

XIV 3.35



CANONISATIO B. VINCENTII à PAULO,

Fundatoris Presbyterorum Sæcularium Congregationis Missionis, & Societatis Puellarum, quæ Charitatis nuncupantur.



CRACOVIAE TYPIS VNIVERSITATIS.

405737



CANONISATIO B. VINCENTII A PAULO.

Fundatoris Presbyterorum Sæcularium Congregati-
onis Missionis, & Societatis Puellarum, quæ
Charitatis nuncupantur.

CLEMENS EPISCOPUS Servus Servorum Dei.

Ad perpetuam rei memoriam.

§. I. **S**UPERNA Jerusalem, & Beata DEI vi-
ventis Civitas, in quâ à cælesti Pâtre
Familias unus æternæ vitæ denarius æ-
qualiter omnibus, qui in Vinca sua
operati sunt, distribuitur, habet diver-
sa loca, & Mansiones, quas quisque
pro suo accepturus est merito. Itaque
anxios Apostolos de morte Christi, &
de sua infirmitate trepidos, & de futuro præmio sollicitos,
cum audivissent Petrum promptiorem animò, ac fidentiore,
qui cæterorum Caput, & Princeps constitutus fuerat, ter Do-

minum ad Galli cantum negaturum, solatus est Christus Dominus, dicens: In domo Patris mei Mansiones multæ sunt; significans his verbis, quod nemo eorum, licet alius alio fortior, alius alio infirmior, alius alio justior, ab illa felici domo excluderetur, in qua multæ essent mansiones, nempe diversæ meritōrū in una vita æterna dignitates. Siquidem alia est claritas solis, alia claritas Lunæ, alia claritas Stellarum, Stella enim a Stella differt in claritate. Et non una expressa est in Evangelio fecunditas; nam facit aliud quidem centesimum, aliud autem sexagesimum, aliud vero trigessimum: ubi centenus fructus Martyribus, sexagenarius Virginitibus, alius aliis assignatur. Multæ igitur in domo DEI Mansiones, non una Stellarum claritas, non idem, sed multiplex est fructus; ita etiam non una est corona, quæ tempore persecutionis accipitur: habet & pax coronas suas, quibus de varia, & multiplici congressione Victores, prostrato & subacto adversario, coronantur; libidinem subegisse, continentia palma est: Contra iram, contra injuriam repugnasse, corona patientia est: De avaritia triumphare est: pecuniam spernere: Laus est fidei fiducia futurorum mundi adversa tolerare; & qui superbus in prosperis non est, gloriam de humilitate consequitur: & qui ad Pauperum fovendorum misericordiam pronus est, retributionem Theauri Cælestis adipiscitur: & qui invidere non novit, quique unanimis, & mitis fratres suos diligit, dilectionis & pacis præmiō honoratur. In hoc virtutum stadio, ad has justitiæ Palmas, & Coronas accipiendas Beatus DEI Servus VINCENTIUS à PAULO non solum ipse pervenit, sed alios etiam plurimos operā, & exemplō suō perduxit. Nam tanquam strenuus DEI miles deponens omne pondus & circumstans peccatum, propositum sibi certamen aliis virtute præcurrens inivit, & ad longævam usque senectutem adversus Principes, & Potestates, & Rectores mundi tenebrarum harum fortiter, ac legitimè certavit, & de manu Domini in terra illa beatitudine meruit coronari. Quem autem DEUS, qui facit mirabilia magna solus, æternæ felicitatis præmio

præmiō donaverat in cælis, in terris quoque signis, ac prodigiis illustrem reddere voluit, eo potissimum tempore, quo in Galliis Novatores falsis, fictisque miraculis suos diffundere errores, pacem Catholicæ Ecclesiæ turbare, simplices ab unitate Romanæ Sedis abducere conabantur.

§. 2. Itaque divinæ obsequentes voluntati, ut ad curiendam viam salutis excitentur Fideles, ut Perverforum coerceatur pravitās, & Hæreticorum confundatur improbitas, Servum DEI VINCENTIUM ab universo fideli Populo, cujus regimini superna dignatione immerentes præsidemus, Sanctorum cultu & honoribus colendum, ac venerandum hodiernā die Apostolicā auctoritate decrevimus. Exultet igitur, & gaudeat Ecclesia, novum a DEO Patronum sibi oblatum esse, qui pro peccatis populi apud Dominum preces adhibeat. Laudent eum universi fideles, & eo cultu, atque iis honoribus prosequantur, quibus DEUS in Sanctis suis honoratur. In Psalmis igitur, in Hymnis, & Canticis spiritualibus, in compunctione cordis, & egenorum miseratione præclaram de mundo, ac Diabolo relatam victoriani, & spirituales Servi Dei triumphum celebremus. Tempia quidem in ejus honorem immortalī DEO ædificentur; sed nos, qui Templum Dei sumus, humanæ pravitatis labe polluerē, ac violare timeamus, demūque operam, ne quid immunum, aut Profanum Templo Dei, hoc est animæ nostræ inferatur, ne offensus, sedem, quam inhabitat, derelinquat. Ejus memoriæ, & Altaribus dona, & munera offerantur; sed exhibeamus quoque corpora nostra hostiam viventem, Sanctam, Deo placentem, rationabile obsequium nostrum: Ejus denique religiosa simulacra, Sacræque Imagines in veneratione, & cultu habeantur: sed ejus virtutum egregiam formam, sanctæque conversationis imaginem divinā opitulante gratiā in nobis ipsis exprimere, ac repræsentare, quoad cujusque nostrum imbecillitas patitur, sollicitē studeamus.

§. 3. In humili pago, quem Ranquines dicunt Anquensis Diocesis

ceffis, ex pauperrimis, sed piis parentibus natus est VINCENTIUS à PAULO, qui à pueritia tanquam innocens Abel Pastor ovium fuit, & ad eum, & ad munera ejus respexit Dominus. Nam in innocentia vivens, de sua parsimonia, & abstinencia gratum Deo offerebat Sacrificium pietatis; siquidem farinam, dum à mola rediret, & panem sibi in tenuem victum à Parentibus traditum, pauperibus distribuebat, impendens virtuti, quod propriè subtrahebat sustentationi, ut fieret refectio pauperum abstinencia jejunantis, Ardentem enim pii adolescentuli charitatem, paupertas non retardabat, licet parvum esset, quod posset de sua facultate decerpere, tamen animi magnitudine, census angustiam superabat. Itaque dimidium scutum, quod quotidianà parsimonia & industrià, frugalitate è suis laboribus minutatim, collegerat, occurrenti misero totum elargitus est, ad exemplum illius pauperulae viduae, quæ à Domino meruit laudari, quia non ex eo quod abundabat illi, sed de penuria sua omnia, quæ habuit, misit totum victum suum.

§. 4. Ab agresti, & pastoritia vita advocatus à patre Aquas missus est, ut in convivio Fratrum Ordinis Sancti FRANCISCI literis operam daret, Id autem sedulò, ac diligenter executus est, càm morum integritate, & erga Deum pietatè se gerens, ut æqualibus exemplo majoribus admirationi fuerit. Hinc Tolosæ, deinde Cesareæ Augustæ in Theologiæ Studijs operà diligenter posita, castus, humilis, & modestus, & quales in sortem Domini vocatos esse decet, per omnes Ecclesiasticos Ordines ad Sacerdotii sublimem dignitatem ascendit.

§. 5. Vix autem fuerat Sacerdotali honore insignitus, inscius, & absens; cum fama ejus probitatis, & doctrinæ increbuisse, ad pinguem beneficii præbendam nominatus est, quam, ut rescivit, sine judiciali controversia se adipisci non posse, sponte, ac libenter dimisit; nam amans potius injuriam accipere, & fraudem pati, quam judicio cum fratre contendere, uberi voluit carere proventu, quem sine lite ab Ecclesiastico viro, ut ipse aiebat, omnino fugiendâ, consequi non potuisset.

§. 6. Interea ne aliis oneri esset, sed sibi, & pauperi Matri victum honestis laboribus, & laudabili industria subministraret humaniores literas in castro non ignobili, quod Bissetum vocant, Diœcesis Tolosanae, deinde in ipsa Urbe edocuit. Et quoniam ejus potissima cura, & vigil sollicitudo erat adolescentum mentes non rerum divinarum sterili dumtaxat notitia instruere, sed eorum animos ad coelestem sapientiam amplectendam impellere, & mores ad sublimem Christianae professionis virtutem, & sanctitatem informare, Nobiles viri certatim filios suos ejus curae committebant, ut in via Domini, & Sanctorum scientiam sub tanti viri proficerent Evangelicam disciplinam, & pietatis magisterio.

§. 7. Profectus Massiliam, ut pecuniam, quae ex credito relicta sibi hereditatis debebatur, acciperet, cum Massiliam Narbonem versus remeaturus Tolosam secundo vento navigaret, in Turcas incidit, qui navis Magistro, aliisque interemptis Vincencium sagittâ vulneratum, vestibus exutum, & catenis onustum in Africam captivum abduxerunt. Multa & gravia à Turcarum savitia ne legem Domini sui defereret passus est, sciens non esse condignas passionem hujus temporis ad futuram gloriam quae revelabitur in nobis.

§. 8. Narrant, cum fortè unum è conservis suis sub gravi catenarum pondere miserè laborantem conspexisset, nec ad sublevandas miseri illius angustias haberet quod traderet, se ipsum dedisse in vincula, ut corporis sui dispendio alienam redimeret calamitatem. Duris agrorum culturae laboribus immitti ab hero addictus fuerat, qui ultimus extitit, (nam tres toto captivitatis tempore habuit) eumque saepe consueverat una ex concubinis herilibus adire, quae à nativitate professione Mahumetana, Christianae tamen Religionis instituta, & fidem audiendi percupida erat. Quâdam die cum plura de Deo, & Christiana Religione rogasset, jussit, ut aliquid cantaret ex Canticis Sion. Tunc verò Servus Dei Psalmum illum (super flumina Babylonis
illie

illic sedimus, & flevimus) aliaque pia carmina cecinit; dum autem ad incircumcisas Mahumetanæ aures Sacrum Domini canticum ex ore VINCENTII resonabat, DEUS operatus est in corde profanæ faminæ, ut aliquam cœlestis dulcedinis suavitatem perferiret. Itaque domum regressa maritum qui à Christiana fide, ut Mahumetis sequeretur deliramenta, defecerat, convénit, eumque reprehendit Religionem suam reliquisse, quam optimam esse censebat, tum ex iis, quæ de ore servi audierat, tum ex inusitata voluptate quam ex cantico perceperat quantâ neque in majorum suorum paradiso se fruituram, esse sperabat. Verbis faminæ commotus impius ille respexit foeditatem suam, eamque damnavit, atque exuere decrevit, adjuvantibus monitis, & orationibus probi famuli sui VINCENTII, qui cum re compositâ parvâ naviculâ, è Turcarum manibus in Gallias aufugit, ibique à VINCENTIO Apostolicæ Sedis Avenionensi Pro-Legato exhibitus, Sacris servatis ritibus, impositâque pœnitentiâ Ecclesiæ reconciliatus est.

§. 9. Romam deinde Servus Dei se contulit, ut sacras Martyrum veneraretur exuvias, quorum sanguine expiata Urbs, quæ fuerat Sedes superstitionis, facta est Mater, & Magistra Religionis, & ut ad sepulchra Apostolorum se prosterneret, & Cathedram Petri adoraret cujus dignitas etiam in indigno herede non deficit.

§. 10. Reversus in Gallias, suadente eximiâ pietate virô Petro Berullo auctore Congregationis Oratorii JESU, & postea Sanctæ Romanæ Ecclesiæ Cardinali, primùm in Parisiensi, deinde in Lugdunensi Diœcesi Parochiam administrandam suscepit, ubi factus forma gregis ex animo oves sibi commissas dirigens in viam Domini verbô pavit, & exemplô. Et quoniam missis quidem multa Operarii autem pauci juniores Clericos in ædibus suis alendos, educandosque excepit, quibus cum communem vitam agens eos in lege Domini instruebat, ut ad majorem proventi ætatem possent verbo Dei, & doctrina salubri Ecclesiam Domini ædificare.

§. 11. Fama pietatis VINCENTII, & odor bonæ ejus conversationis pervenit ad Sanctum FRANCISCUM SALESIIUM, qui eum Sanctimonialibus Visitationis nuncupatis, quarum Monasterium nuper Parisiis erectum fuerat, præposuit: in commissio autem sibi difficili ministerio vigil Sacrarum Ancillarum custos, & prudens animarum rector ostendit, & opere comprobavit, quam verum, & rectum esset judicium Sanctissimi Præsulis, qui sacerdotem VINCENTIO digniorem nullum se nosse palam affirmabat. Porro per quadraginta annos singulari prudentiâ, curâ, & sollicitudine, Sacris illis Virginibus ad viam salutis Beatus Dei Servus consuluit, ut quæ à carnali concupiscentia recedentes tam carne, quam mente se DEO voverant, consummarent opus suum, & ad Dei munera per Divina præcepta pervenirent.

§. 12. Sed flagrans VINCENTII Charitas haud intra Sanctimonialium claustra continebatur, sed cum probè intelligeret nullam esse excellentiorem, præstantioremque curam, quam quæ curandis, sanandisque animis collocatur, ad incundam spirituales pugnam contra concupiscentiam carnis, & pravitatem mundi, contra superbiam, & malitiam sæculi, contra calamitates, & miseras filiorum Adam, contra parvulorum ignorantiam, contra demum spirituales nequitias instruxit exercitus fortium, qui præliarentur prælia Domini. Nam anno millesimo sexcentesimo vigesimo quinto instituit Congregationem Presbyterorum Sæcularium Missionis, qui contemptis atque desertis mundi hujus illecebris in communem vitam castissimam, sanctissimamque congregati, nihil proprium habentes, simul ætatem agerent, viventes in orationibus, in lectionibus, in exhortationibus, aliisque spiritualibus exercitiis, quibus Clericos Sæculares in scientia Domini, in Ecclesiasticis ritibus, & sacro instruerent ministerio, Laicos autem mandatorum Divinorum, rerumque coelestium meditatione eis propositâ ad viam salutis currendam accenderent: qui perpetuò voto ad peragendum Apostolicum Sacrarum Missionum opus, præsertim in Pagis, in Villis,

lis, locisque Campestribus, ubi jacentibus in tenebris, & umbra mortis rarò Evangelicæ veritatis lumen affulget, se Deo obstringerent: qui nullâ superbâ tumidi, nullâ pervicaciâ turbulenti, nullâ invidentiâ lividi, sed modesti, verecundi, pacati, concordissimam vitam, & intentissimam in Deum, proximique salutem, gratissimum munus omnium bonorum datori offerrent.

§. 13. Christiana autem Charitas erga Proximum, quæ a Charitate Dei tamquam à fonte proficiscitur, & mirabili quodammodo tanquam gradibus per eam ad perfectum DEI amorem ascenditur, non solum providet salutem animarum, sed etiam corporis indigentis consulit. Itaque Servus DEI perfectâ ardens charitate, & animis, & Corporibus subvenire, ac benedicere satagebat, agebatque, quantum poterat, ut proximus salvus corpore, salvusque animò esset, ita tamen, ut omnem corporum curam ad salutem animarum, de qua potissima debet esse sollicitudo, referret. Quamobrem totis miserationis visceribus compatiens calamitatibus, & angustiis miserorum, præsertim ægrotantium, Senum, Puerorum, Puellarumque, qui viribus infirmi, ac debiles sibi succurrere non valentes, sæpe necessario destituti auxiliò, suis miseriis opprimuntur, Societatem Puellarum Charitatis nuncupatarum fundavit, quæ Senioribus, Pueris, egenis, & omnis generis ægrotantibus curandis inserviendisque diu noctuque allaborarent.

§. 14. Præterea non solum in singulis Urbium, sed etiam Pagorum, & Villarum parœciis sodalitates Matronarum instituit, quarum sollicitâ cura, & diligenti sollicitudine miserorum pressuræ, & angustia levarentur, ægrotantibus remedia tam Corporalia, quàm Spiritualia, calamitosæ opes atque auxilium, egentibus pecunia, nudis vestimenta, afflictis consolatio afferretur; Erigendas etiam curavit, variisque in locis jam antè erectas adjuvit, maximeque promovit Societates Puellarum Crucis, Providentiæ, & Sanctæ Genovetæ, à quibus educarentur, instruerenturque in famulicis opificiis, honestisque moribus

bus pauperes puellæ, ne in maturiorem ætatem adultæ ignorantia Dominicæ legis, aut Divinorum Myfteriorum incitiâ laborerentur, vel otioſæ diſcerent circumire Domos, & loquentes, quæ non oportet retrò Satanam converterentur, vel manibus laborare neſcientes domeſticis oppreſſæ difficultatibus ad flagitia, & peccatâ, inopiâ & egeſtate impellerentur.

§. 15. Inſuper hoſpitiū pro amentibus cuſtodiendis, Domum ad immorigeros adoleſcentes corrigendos, & amplum hoſpitale ad fovendos, alendosque Senes, & Artiſices, qui ad ſibi victum manibus ſuis quærendum impotentes, calamitate aliquâ evaſerunt, ædificavit. Demum valetudinaria pro infirmis Remigibus, qui prius in antra more beſtiarum detrudebantur, Pariſiis & Maſſiliæ eò enixè procurante regiâ liberalitate conſtructa, & dotata fuere, in quæ miſeri illi ægritudine laborantes tranſlati, & Spiritualibus, & Corporalibus ſubſidiis recreantur.

§. 16. Eximia enim VINCENTII probitas, vitæque integritas eò magis, magisque in diem elucens, quò ſtudioſius ab ipſo occultabatur, claræ memoriæ Ludovico XIII. Galliarum Regi innotuerat, ideoque vivens ejus operâ ad diſtribuendas occultas clæmoſynas, ejusque conſiliō in nominandis Clericis ad Epiſcopales Cathedras, & Eccleſiaſtica beneficia utebatur: moriens in ultimo illo agone VINCENTIUM ſibi adiutorem, conſultoremque eſſe voluit.

§. 17. Poſt verò illius obitum claræ memoriæ Anna Auſtraca illius uxor, & Galliarum Regina eum licèt reluctantem, & invitum in ſanctius conſcientiæ conſilium adſcivit; ipſe autem ubique, & in Palatio inter aulicos, & domi inter ſuos Miſſionis alumnos, & in foro inter Cives, & in privatis domibus inter egentes, & calamitoſos, & in publicis hoſpitalibus inter Senes, & ægrotos, & in villis, ac pagis inter villicos, & agreſtes, & in Sacrarum Virginum aſceteriis, & in Eccleſiaſticis Clericorum conventibus, & ubique inter omnes, charitatis officia obibat, ſanctitatis lucem diffundebat, bonum Chriſti odo-

rem disseminabat, siquidem in regia domo sæculi vanitate contempta, & divitiis, ac honoribus conculcatis ad DEUM conversas, & in Cælo fixas omnes cogitationes suas habebat. Itaque ejus præcipua cura fuit, ut Parochialibus Præbendis, Ecclesiasticis dignitatibus, & beneficiis, quæ sunt bona pauperum, & patrimonium Christi digniores præficerentur, & cum Nobiles viri filios suos commendarent, & promissis aut minis urgerent, vel speranda præmia irrisit, vel prætentas minas calcavit. Neque anima fortis & robusta detrimento hereditatis Christi, & Crucis dispendio potentes sibi optavit amicos, aut de comminatis malis trepida inimicos formidavit.

§. 18. Inter suos autem Sacrarum Missionum Socios, quos secum præsertim ad rusticos, & agrestes fidei Catholicæ mysteria & divina præcepta edocendos voto obligari, tum etiam clero ritè instituendo, aliisque charitatis operibus addici voluerat, robore accinctus ex alto, toto peregrinationis, ac conversationis suæ tempore fidelem se Ministrum, strenuumque, ac indefessum vineæ Domini cultorem, atque operarium exhibuit.

§. 19. Cum autem illorum regimen, non ut quidam, vim fecisset, ut adipisceretur, sed vim passus esset, ut acciperet, ita versabatur, ut omnes intimis charitatis visceribus complecteretur. Curabat enim, ne quem tristitia affligeret, ne cogitatio secularis urgeret, & vigili pietatis dispensatione providebat, ne illi nimius labor gravaret, ne nimia hic quiete torpesceret, alentes corpore avocans à desidii, ferventes spiritu cogens ad requiem, suave Christi jugum omnibus allevans, & quidquid Diabolus injecisset, omnes in Sanctam Animarum societatem, & perfectam Christi charitatem, unitos ad currendum Christianarum virtutum stadium, verbò, & exemplò animabat.

§. 20. Ipse autem, qui omnibus Sanctitatis meritò, & dignitatis gradu anteibat, humili animi demissione inferior erat, semetipsum palàm hominem dictabat nihili, filium villici, & olum gregis addictum custodiæ, perpetuæ suæ Congregationis præfecturæ

præfecturâ in generali conventu se ineptum & imparem muneri ferendo præ humilitate affirmans se abdicavit, & efflagitanti in locum sui alium substitui, ab iteratis totius Conventûs precibus vis ei quodammodo illata est, ut imposterum exerce-
ret. Etenim quò sublimiùs ad Sanctitatis altitudinem, DEUM cognoscendo, & amando ascendebat, eò inferiùs agnitione & contemptu sui se demittebat; ideo vilissima quæque domûs obibat officia, & sæpe genibus flexis & fluentibus lachrymis veniam à suis petebat, quòd malis exemplis aliorum animos offendisset. Ob eximiâ pietatis opera excellentesque virtutes summam gratiam adeptus erat in aula regia: Plurimi enim faciebat eum Galliarum Regina, & apud omnes tum Episcopos, tum Cardinales, aliosque Optimates, & Ecclesiasticos, & Seculares, & apud omnes cujuscvis generis statûs, & conditionis homines magno in honore, & existimatione habebatur. Ipse verò coram DEO omnium bonorum datore humilians se, nihil vanum aut superbum, nihil procax aut inverecundum, nihil intemperans aut immoderatum, vel in opere, vel in sermone præ se ferebat; sed omnia ordinata, & ad Christianam disciplinam, & Evangelicam Sanctitatem composita aperte ostendebat, nihil intus latere tenebrarum, ubi foris tanta lux virtutum præfulgebat.

§. 21. Temporum iniquitas & Civilium bellorum tumultus Galliarum Cleri sanctitatem, invecetâ ignorantia corruptisque moribus labefactaverat, ad reparandum decorem Domûs DEI, restituendamque Ecclesiasticam Disciplinam, vires omnes & cogitationes suas VINCENTIUS intendit. Itaque ut restauraretur Ecclesiasticæ Disciplinæ vigor, qui languore vitiorum enervatus fuerat, Religiosas Domos recipiendis Clericis, qui ad Sacros Ordines promovendi essent, assignavit, eosque in Sacris Ritibus peragendis, sanctisque moribus efformandis, qui ad gradûs dignitatem responderent, per se suosque Missionis Socios instruendos curavit. Hinc autem Sacrarum Cæremonia-

rum nitor, & venerabilis observantia in multas Galliarum Ecclesias revocata est.

§. 22. Insuper catus adunavit Sacerdotum, qui statutis diebus de Divinis rebus inter se conferrent, & se in sacris disputationibus exercerent, ut potentes essent exhortari in doctrina sana, & eos, qui contradicunt arguere.

§. 23. Exemplō autem Moysis, qui priusquam à DEO præficeretur Israëlítico Populo, ut eum à captivitate liberatum per desertum ad sacrificandum DEO in Monte, & deinde ad Terram promissionis deduceret, à strepitu Pharaonis aulae aufugit in solitudinem: ita Clericis in sortem Domini vocatis, qui in hujus mortalis vitæ terra deserta, & inaquosa ad Altare Domini ministrantes verbō, & exemplō Sanctæ DEI Plebi tendenti ad Coelestem patriam excussō Diabolicæ captivitatis jugō præire debent, author fuit, ut priusquam ad Ecclesiasticos gradus ascenderent, à mundanis tumultibus in Sanctam secedentes solitudinem per aliquot dies Divinis rebus meditandis, contemplandisque sui muneris officiis vacarent.

§. 24. Profectō non solum DEI SERVUS VINCENTIUS egregius fuit Ministrorum Altaris Institutor, sed & boni, & fidelis Dispensatoris formam in se exhibuit. Nam erat veluti omnium egentium, & miserorum perfugium, & cujusvis generis pauperes, erogatis etiam nonnunquam, quæ sibi, suisque Missionum sociis videbantur necessaria, ita largis sublevabat Eeëmosynis, ut communiter Pauperum Pater nuncuparetur. Assiduam, licet jam provectus esset ætate, Apostolicō Sacrarum Missionum ministerio dabat operam, huc illuc alis charitatis super omnem laborem, & super senilis ætatis vires volitans, lucem Evangelicæ veritatis, & divinorum mândatorum scientiam ambulanti-
bus in tenebris, & vitiorum caligine præferebat, præsertim pauperrimis villarum, & pagorum incolis, quos lumine Christianæ Fidei destitutos, in ignorantia nocte per devia aberrantes, in viam Domini reducebat. Et quoniam Charitas mensu-

ram

ram non habet, Servi DEI virtus Galliarum terminis restricta non est, sed longè latèque diffusa eluxit: nam ad amplificandam fidem & pietatem Evangelicos misit ex suis Alumnis Operarios non solum in Italiam, Poloniam, Scotiam, Hyberniam, sed etiam ad barbaros, & Indos, nostrisque terris dissociatas Gentes, quas suorum Alumnorum opera dispersis Idololatriæ tenebris ad lucem veritatis adduxit.

§. 25. In remotis autem provinciis animarum salutem expectans, corporum etiam egestatibus consulere non omittebat, ut per temporalia subsidia carnales homines ad DEUM attraheret. Itaque non modo Lotharingiam, Campaniam, Picardiam, peste, fame, bellòque vastatas largiter refecit missis ingentibus pecuniarum summis, ad quas distribuendas fidei opera Puellarum Charitatis utebatur, sed in aliis etiam remotissimis regionibus, hominibus inopiâ, aut calamitate aliquâ laborantibus subvenit. Er cum ipsa Parisiorum Civitas ingenti annonæ penuria gravissimè vexaretur, domi suæ ad duo millia pauperum sustentavit.

§. 26. Et quamquam variis multisque tum Regiæ aulæ, tum suæ Congregationis, aliorumque locorum, quæ fundaverat, vel quorum curam habebat, distentus negotiis esset, in quibus omnibus indefessam ad DEI gloriam navabat operam, tamen omnium necessitatibus subveniebat, omnium sublevabat angustias, nullum a se repellebat, omnes in CHRISTO complectebatur. Profectò mirum erat, quòd nemini ad se negaret aditum, faciles omnium postulationibus accomodaret aures, blandè responderet, comiter exciperet, nullius conciraret invidiam, sed omnibus omnia factus, aliorum curaret corpora, aliorum sanaret spiritus, & prout quisque indigens erat, aut vestimentis, aut sumptibus, aut doctrinâ, vestiret, aleret, instrueret, ostendens quemadmodum, etsi non omnibus omnia, omnibus tamen charitas, nulli debeatur injuria. Etenim injurias quæ ab aliis sibi propter justitiam inferebantur, tantùm absuit, ut cum faciliò possit.

lè posset, ulcisceretur, quin neque unquam de illis queri auditus fuerit, quia de se humiliter sentiens, illas, si quando accipiebat, meritò se pati judicabat. Itaque adeò patienti animò eas tulit, ut à conviciis sibi faciente veniam flexis genibus petiverit, percutienti autem maxillam, alteram humiliter præbuerit.

§. 27. Militibus cecà rabie, & infano furore infortunatum quemdam artificem jam vulneratum nudis gladiis, ut morti traderent, persequentibus, corpus suum opposuit, & se in apertum vitæ discrimen objecit, ut DEO lucraretur, quem è faucibus præsentis mortis periculo capitis & sanguinis sui eripuisset, & quidem tantâ tamque inusitatâ animi fortitudine attonitis, & verbis Servi DEI mollitis militum animis, pacati recesserunt; miser autem ille vivus evasit.

§. 28. Sed quoniam Dominicus ager, cujus nos operarii sumus, rorante desuper gratiâ DEI, fide munitur, jejuniis exercetur, elèmosynis seritur, orationibus fecundatur; ideo Beatus VINCENTIUS, ne mortalis corporis spirituali culturâ neglectâ, generosum germen periret, & innascentibus spinis, ac tribulis ea producerentur, quæ urenda sunt flammis, non quæ Dominicis horreis reconduntur, membra sua domare ciliciò, conterere jejuniis, aliisque pœnitentiæ operibus, præcipuè in communibus totius Galliarum Regni, & Catholicæ Ecclesiæ calamitatibus consuevit.

§. 29. Si in negotio aliquo gravi, & difficili sententiam rogatus, responsum dare cogeretur, aut si aliquid arduum, & insolitum faciendum sibi propositum esset, DEUM, ut Sanctus Rex David, priusquam rem aggrediretur, consulebat, & supplex à Patre luminum postulabat, ut menti suæ lucem ejus claritatis infunderet, quâ & quæ respondenda, aut agenda essent, perspiceret, & quæ cognita, & perfecta essent, Divinâ præveniente gratiâ sequeretur, & quod bonum, & placitum DEO esset, eâ adjuvante perficeret; quoties è cubiculo domûs suæ prodibat in
publicum

publicum se coram DEO in terram prosternebat, & divinam opem enixis, sed brevibus precibus implorabat, ne transiens, licet invitus, per semitas sæculi, & terrena, ac mundana tractans, cæno filiorum hominum inquinaretur. Ubi verò domum redierat, intrabat secreta cordis sui, & latitantem conscientiam, ad examen vocabat, & cogitationibus inter se invicem accusantibus, aut etiam defendentibus sollicitè inquirebat, studiosè emendabat, severè puniebat; si quid imprudens ex ore excidisset, aut incautè operatus esset. Adeò diligens erat in custodiendis viis Domini, qui mandavit mandata sua custodiri nimis.

§. 30. Assiduæ autem orationi deditus à divinarum rerum contemplatione nullis turbis, nullis rebus aut lætis, aut tristibus abstrahatur. DEUM enim semper præsentem menti habebat, & in ejus conspectu stabat; omnia autem, quæ ipsius oculis obversabantur, diligenti curâ, sanctâque industriâ effecerat, ut rerum omnium Creatorem in ejus mentem revocarent, & DEI gloriam, divinasque laudes ei suo modo loquentes ad cœlestem pulchritudinem contemplandam excitarent. Itaque semper modestus, & mitis, mansuetus, & benignus, in omnibus mirabili animi æqualitate utens, neque lætis efferebatur, neque turbabatur adversis, quia cum Prophetâ dicere poterat: Providebam Dominum in conspectu meo semper, quoniam à dextris est mihi, ne commovear.

§. 31. Ab incruento Altaris Sacrificio nunquam abstinuit, ita vivens, ut quotidie offerre posset. Et quia nonnullis antea obitum mensibus ob tibiæ morbum gravissimè adactum pedibus insistere nequibat, aderat quotidie Missæ Sacrificio, & Pane Angelico refectus post humilem gratiarum actionem solemnes Ecclesiæ preces pro Agonizantibus præscriptas veluti propediem ex corporeo carcere ad cœlestem Patriam migraturus pro animi sensu recitabat.

32. Vivâ enim in DEUM fide animabatur, cujus dum vixit

strenuus defensor, & propugnator fuit; nam exortâ in Galliis hæreticâ tempestate, quæ turbine suo cuncta turbaverat, ingemuit DEI Servus, postquam sensit Catholicam Fidem in plerisque Jansenianâ labe violari, & ab Hæreticorum astutia plurimorum illudente simplicitati ex omni ordine multos in prævium sensum trahi. Itaque sancto DEI zelo succensus contra communes hostes arma fidei arripienda censuit, & quærens DEO, non hominibus placere, Sacros Ecclesiæ Pastores excitavit, ut supra Christi Domini ovile excubias agentes, non sinerent Lupos rapaces Dominicas oves latentes occidere. Itaque eo, quantum poterat, hortante, ac suadente, octoginta quinque Galliarum Episcopi, quibus postea alii adjuncti sunt, clam irrepentem morbum, & latentem pestem ad culmen Apostolatûs, ad Cathedram Petri detulerunt, ad quam pericula quæque, & scandala in regno DEI emergentia, ea præsertim quæ fidem lædunt, referenda sunt, ut ibi potissimum damna fidei refarciantur, ubi nequit fides sentire defectum. Itaque datis ad felicitis recordationis INNOCENTIIUM X. Prædecessorem Nostrium literis Galliarum Præsules humillimis precibus postularunt, ut Apostolico ore pullulantes damnarentur errores, quo suis constabilita regulis Ecclesia, & eo, quod illi timebant, pronuntiati-
onis justæ firmata Decreto, improbis ad eam aditus patere non posset, qui perversis instructi verborum ambagibus, & callidis argumentorum argutiis sub imagine Catholicæ fidei disputantes, & pestiferum exhalantes virus hominum rectæ sentientium in deterio-
rem partem corda corrumpere, & totam veri dogmatis de libero arbitrio, & Gratiâ DEI, & hominum redemptione per passionem, & mortem CHRISTI Domini quærebant evertere veritatem.

§. 33. Ubi verò responsum Româ venit, Decretum Successoris Petri submissâ animi veneratione suscepit, & exultans in Domino Sententiâ Apostolicæ Sedis causam finitam esse, ut tandem finiretur error, summo studio allaboravit: & prima ejus

curam

cura, ac sollicitudo fuit, ut ab omnibus Religiosis Coetibus, quos ipse fundaverat, vel quorum curam gerebat, ut occulta Catholicae Fidei inimica pestis arceretur, ne rabida alicujus partis contagione sana quoque membra corrumperebuntur. Præterea magnam noscens esse pietatem, proderet latebras impiorum, & ipsum in eis, cui serviunt, Diabolum debellare Apostolicam libertatem, qualis in negotio fidei Servum DEI decet, Regem, Reginam, Regiosque Ministros commonere non destitit, ut debitis poenis contumaces ad obedientiam inducerent, pertinaces verò in suis erroribus à toto Galliarum Regno tanquam pestiferam luem propellerent, atque ita Secularis districtio prodesset Ecclesiasticae lenitati, quæ etsi Sacerdotali contenta judicio cruentas refugit ultiones, severis tamen Christianorum Principum constitutionibus adjuvatur, dum ad spirituale nonnunquam recurrunt remedium, qui timent corporis supplicium.

§. 34. Demum plenus dierum, & meritorum, cum ad octogesimum quintum suæ ætatis annum pervenisset, non minus senio, quam corporis laboribus, quos pietatis operibus, & animarum saluti jugiter intentus, alacriter susceperat, & ad extremum usque spiritum fortiter toleraverat fractus, & Ecclesiæ Sacramentis munitus, coelestia anhelans, terrena despiciens, Sacerdotibus extrema Religionis officia præbentibus ad verba illa sibi familiaria: DEUS in adjutorium meum intende: Respondens, Domine ad adjuvandum me festina; non de suâ virtute, sed de Divino adjutorio confisus, Parisius in domo Sancti LAZARI Presbyterorum Sæcularium Congregationis Missionum, feliciter cursum consummavit quinto Kalendas Octobris Annò millesimò sexcentesimo sexagesimò.

§. 35. Post ejus mortem longè, latèque fama Sanctitatis percrebuit, quam etiam multis DEUS contestatus est signis & miraculis, quibus admirabilis ejus Providentia abundantior exanimis Servi sui reliquiis venerationem conciliavit, decla-

rans, quanto in honore apud DEUM ejus anima esset, cum apud ejus Corpus, quod vitâ emigrante tanquam deforme remanserat, tam evidenter præsens vitæ Dator apparet.

§. 36. Itaque Parisiis duo Processus, ut moris est, autoritate ordinariâ constructi fuerunt, alter super fama Sanctitatis, virtutibus, & miraculis; alter verò super cultu non exhibito, quibus permisso felicis recordationis CLEMENTIS XI. Prædecessoris Nostri apertis, eorumque validitate in Sacrorum Rituum Congregatione approbatâ, die quartâ mensis Octobris Annò Domini millesimò septingentesimò nonò, commissio Introductionis causæ signata fuit, subinde præmissis omnibus quæ ex Apostolicæ Sedis præscripto in hisce causis exiguntur, tractatum est, an constaret de virtutibus Theologalibus, & Cardinalibus in gradu heroico; post ultimam autem Congregationem Venerabilium Fratrum Nostrorum Sanctæ Romanæ Ecclesiæ Cardinalium sacris Ritibus Præpositorum, quæ generalis fuit, piæ memoriæ BENEDICTUS XIII. qui nobis in Pontificatu præcessit die vigesimâ primâ Mensis Septembris Annò Domini millesimò septingentesimò vigesimò septimò decretum videlicet constare de virtutibus, tum Theologalibus, tum Cardinalibus in gradu heroico publicari mandavit.

§. 37. Ventum est deinde ad examen miraculorum, quod peractum fuit in tribus Congregationibus, quarum ultima generalis habita fuit die decima secundâ Mensis Julii ejusdem anni, & approbata fuerunt quatuor miracula, scilicet: Primum subitæ sanationis Claudii Josephi Compoin à cæcitate. Secundum instantaneæ largitionis loquelæ, & virium Mariæ Annæ Lhullier puellæ octenni à nativitate mutæ, & ad motum artuum inferiorum impotenti; Tertium instantaneæ sanationis Sororis Máthurinæ Guerin ab inveterato, & maligno ulcere intibîâ. Quartum verò subitæ sanationis Alexandri Philippi le grand ab inveterata, & contumaci paralyfi.

§. 38. Quod autem de miraculis à præfatâ Rituum Congregatione

gatione judicatum fuit, idem BENEDICTUS Prædecessor Noster confirmans, ejusdemque Rituum Congregationis esse locum solemni Servi DEI Beatificationi pronuntiantis Decreto annuens die decimâ tertiâ mensis Augusti Annô Domini millesimô septingentesimô vigesimô nonô, VINCENTIUM à PAULO in Beatorum numerum adscripsit, & ut de Beato DEI Servo quotannis die anniversariâ felicis ejus obitûs quibusdam in locis Officium recitaretur, & celebraretur Missa de Confessore non Pontificè juxta Rubricas Breviarii, & Missalis Romani Apostolicâ autoritate indulisit, ac deindè ut ejusdem Servi Dei nomen inter Sanctos, qui in Romano Martyrologio leguntur referretur, & propriæ de eodem Beato VINCENTIO lectiones à prænominata Rituum Congregatione audito fidei Promotore approbatæ in secundo Nocturno publicè recitarentur permisit.

§. 39. Expeditis postea literis remissorialibus, & compulsorialibus pro conficiendo consueto Authoritate Apostolicâ processu super novis miraculis, quæ supervenerant post decretam ejusdem Servi Dei Beatificationem, eoque ad Urbem delatô, & ejusdem vâliditate recognitâ, præmissis consvets Congregationibus præparatoriis & antipræparatoriis nuncupatis, miraculorum examen delatum est ad Nos, qui eidem BENEDICTO XIII. in Sacro Apostolatûs onere Divinâ disponente Bonitate successimus, & Congregatione generali coram Nobis habitâ die trigesimâ mensis Januarii Annô Domini millesimô septingentesimô trigessimô sextô, auditis Venerabilium Fratrum Nostrorum sententiis, post imploratum Divinæ opis præsidium die vigesimâ quartâ mensis Junii ejusdem Anni, duo ex septem, quæ afferebantur miraculis, plenè approbavimus, videlicet: Primum, instantaneæ sanationis Mariæ Teresiæ à Sancto Basilio à putridis, & diuturnis ulceribus cum longâ & contumaci urinæ retentione, atque enormi hydrope: Et secundum, instantaneæ sanationis Francisci Richer ab hernia perfecta, inveterata & desperata.

§. 40. Quod cum à Nobis peractum fuisset, habitâ iterum eorâ Nobis generali Congregatione, in deliberatione positum est, an tutò procedi posset ad solemnem Beati VINCENTII à PAULO Canonizationem, & unanimi voto Venerabilibus Fratribus Nostri Sanctæ Romanæ Ecclesiæ Cardinalibus, assentientibus, decretum de peragenda Canonizatione solempniter pronuntiavimus.

§. 41. Pluribus mensibus postea elapsis Nos Consistorium secretum de more convocari iussimus, in quo dilectus Filius Antonius Felix tituli Sanctæ Prædixis Presbyter Cardinalis, Zondadarii nuncupatus; suo, & totius Congregationis sacrorum Rituum nomine primum retulit, Scripturas, Processum, omni-que causæ acta ritè confecta fuisse, & plenissimam Autoritatis, & legitimæ probationis vim obtinere, deinde Beati VINCENTII vitâ, virtutibus, ac miraculis diligenter expositis, se & ceteros dictæ Congregationis Cardinales unanimi suffragio censere, Beatum VINCENTIUM, si itâ nobis videretur, posse in Sanctorum Cathalogum adscribi, in quorum sententiam reliqui omnes Cardinales, qui præsentés aderant, concesserunt.

§. 42. Quare in tam sancto, ac gravi negotio nihil omnino necessariæ diligentiae prætermittentes ex more, institutoque Majorum decrevimus, ut ad ulteriora procederetur, & post non nullos dies publicò Consistoriò congregatò, in eo dilectus filius Thomas Antamorus Consistorialis Aulæ nostræ Advocatus, eximia Beati VINCENTII charitate, vitæ innocentia, & miraculis copiosè enarratis, Charissimi in Christo filii nostri Ludovici Francorum Regis Christianissimi, & Charissimæ in Christo filiæ nostræ Mariæ eorundem Francorum Regiæ Christianissimæ ejus Conjugis, aliorum Catholicorum Principum, nec non Venerabilium Fratrum nostrorum Archi-Episcoporum & Episcoporum, & universi Cleri Regni Galliarum, totiusque insuper Congregationis Presbyterorum Sæcularium Missionis nomine, ut Beatum VINCENTIUM in Sanctorum cathalogum referre vellemus, suppliciter à Nobis postulavit. Nos autem pro
rei gra-

rei gravissimæ magnitudine maturius adhuc cum Venerabilibus Fratribus nostris Sanctæ Romanæ Ecclesiæ Cardinalibus, & cæteris Archiepiscopis, & Episcopis deliberandum esse censes, publicas orationes, & jejunia indiximus, atque omnes Christi Fideles hortati sumus, ut Deum Nobiscum precarentur, ut daret Nobis Spiritum Sapientiæ, & intellectus, quò hæc arcana cœlestia, quæ ratione humana comprehendere non possint, cognosceremus, & illuminaret oculos mentis nostræ, ut quid in hac gravissima Causa secundum divinum beneplacitum statuendum esset, perspiceremus.

§. 43. Deinde aliud Consistorium semipublicum à Nobis habitum est, in quo etiam Patriarchas, Archiepiscopos, & Episcopos in Curia Romana existentes, Protonotarios quoque nostros, qui ex numero dicuntur, & Sacri Palatii Apostolici Causarum Auditores interesse iussimus, quibus præsentibus cum plura à Nobis de eximâ Sanctitate Servi DEI, ac miraculorum celebritate commemorata fuissent, recensitis etiam instantiis Catholicorum Principum, & præsertim enixis precibus universæ Congregationis Presbyterorum Secularium Missionis, omnes rogavimus, ut quid censerent, liberis suffragiis exponerent; illi autem singuli ex ordine gravibus sententiis dictis responderunt uno ore benedicentes DEUM, Beatum VINCENTIUM inter Sanctos Confessores reponendum esse: horum omnium audito consensu, intimo cordis affectu exultavimus in Domino, qui concordēs efficeret Fratrum nostrorum voluntates, ut nomen ejus glorificaretur in Servo suo, ad quem honorandum, quantum homines mortales possunt, corda nostra impelleret, & mentes nostras illustraret. Itaque Canonizationis diem indiximus, eosque monuimus, ut in orationibus, ac jejniis perseverantes, Nobis in tanto opere exequendo supernum lumen atque auxilium impetrarent.

§. 44. Omnibus autem ritè absolutis, quæ ex sacris Constitutionibus, Romanæque Ecclesiæ consuetudine peragenda erant, hodie,

hodie, quæ fuit dies Dominica Sanctissimæ TRINITATIS in Sacrosanctam Lateranensem Basilicam decenter ornatam, cum Venerabilibus Fratribus nostris S. Romanæ Ecclesiæ Cardinalibus, necnon Patriarchis, Archiepiscopis, & Episcopis, Romanæque Curia Prælatiis, Officialibus, & Familiaribus nostris, Clero Seculari, & Regulari, ac maximâ Populi frequentia convenimus, ubi repetitis pro Canonizationis Decreto petitionibus à dilecto filio nostro NEREO S.R. Ecclesiæ Diacono Cardinali, Corsino nuncupato, nostro secundum carnem ex fratre Nepote, per eundem Thomam Antamorum Advocatum, & decantatis sacris Precibus & Litanis, ac Spiritûs Sancti gratia humiliter imploratâ, ad honorem Sanctæ & Individuæ TRINITATIS, ad Exaltationem Fidei Catholicæ & Christianæ Religionis augmentum, autoritate Domini Nostri JESU CHRISTI, Beatorumque Apostolorum Petri & Pauli, ac nostrâ maturâ deliberatione præhabitâ, & divinâ ope sapius imploratâ, ac de Venerabilium Fratrum nostrorum Sanctæ Romanæ Ecclesiæ Cardinalium, Patriarcharum, Archiepiscoporum in Urbe existentium consilio, & consensu, Beatum VINCENTIUM a PAULO Sanctum esse decrevimus, definivimus, ac Sanctorum Cathalogo adscripsimus, prout tenore præsentium similiter decernimus, definimus & adscribimus, illumque universos Christi fideles tanquam verè Sanctum honorare, & venerari mandavimus, & mandamus, statuentes; ut ab universali Ecclesia in ejus honorem Ecclesiæ, & Altaria in quibus Sacrificia DEO offerantur, ædificari, & consecrari, & singulis annis die decimâ nonâ mensis Julii, memoria ipsius inter Sanctos Confessores non Pontifices piâ devotione recolî possit.

§. 45. Eademq; autoritate omnibus Christi fidelibus verè pœnitentibus & confessis, qui annis singulis eodem Festo die ad Sepulchrum, in quo Corpus ejus requiescit, visitandum accesserint, septem annos, & totidem quadragenas de injunctis eis, aut alias quomodolibet debitis pœnitentiis misericorditer in

Domino

Domino relaxavimus, & relaxamus in formâ Ecclesiæ consuetâ.

§. 46. His peractis DEUM Patrem Æternum, Regemque gloriæ Christum Dominum, Patris Sempiterni Filium, & Sanctum Paraclitum Spiritum, unum DEUM, unumque Dominum laudibus, & confessionibus venerâti, sacrôque hymnô: Te DEUM solemniter decantatô, omnibusque Christifidelibus tunc præsentibus plenariâ omnium peccatorum suorum indulgentiâ, & remissione concessâ, propter corporales nostras infirmitates affectamque valetudinem, senilemque ætatem ab eadem Lateranensi Ecclesiâ recessimus, remanentibus in eâ Venerabilibus Fratribus nostris Sanctæ Romanæ Ecclesiæ Cardinalibus, Archiepiscopis, Episcopis, & universô Clerô, & populô, quibus præsentibus à Venerabili Fratre Nostro Thoma, Sanctæ Romanæ Ecclesiæ Cardinali, Episcopo Prænestino, Ruffo nuncupato tanquam Cardinali in ordine antiquiori in Ara maxima præfata Basilicæ, ex indulto, & de licentiâ Nostrâ solemniter Missa cum Sancti ejusdem Confessoris commemoratione celebrata est.

§. 47. Decet autem Nos gratias agere, & gloriam dare DEO viventi in sæcula sæculorum, qui benedixit Conservum Nostrum in omni benedictione spirituali, ut esset Sanctus, & immaculatus coram ipso; & cum illum dederit nobis quasi fulgentem solem in Templo suo in hac nocte peccatorum, & tribulationum nostrarum; adeamus cum fiduciâ Thronum Divinæ misericordiæ, ore & opere supplicantes; ut Sanctus VINCENTIUS universo Christiano Populo prosit meritis & exemplo, precibus adsit, & patrociniô, & in tempore iracundiæ fiat reconciliatio.

§. 48. Caterùm, quia nimis difficile foret, præsentes Nostras originales Literas, ad singula loca, ubi opus esset, deferri, volumus, ut earum exemplis, etiam impressis, manu publici Notarii subscriptis, & sigillô alicujus personæ in dignitate Ecclesiasticâ

eleſtaſtica conſtituta muniriſ, eadem, quæ ipſis præſentibus ſi-
des ubique adhibeatur.

§. 42. Nulli ergo omnino hominum liceat hanc paginam
Noſtrorum Decreti, adſcriptionis, mandati, ſtatuti, conceſ-
ſionis, elargitionis & voluntatis infringere, vel ei auſu teme-
rario contraire. Si quis autem hoc attentare præſumpſerit,
indignationem Omnipotentis DEI, ac Beatorum Petri & Pau-
li Apoſtolorum ejus ſe noverit incurſurum. Datum Romæ a-
pud Sanctum JOANNEM in Laterano, Anno Incarnationis Do-
minicæ milleſimo ſeptingenteſimo trigeſimo ſeptimo, ſexto de-
cimo Kalendas Julij, Pontificatus Noſtri anno ſeptimo.

✠ Ego CLEMENS Catholicæ Eccleſiæ
EPISCOPUS.

QVAM

X27X
 QVAM MIRABILIA TESTIMONIA
 TVA DOMINE.



- † Ego Franciscus Episcopus Ostien; Card: Barberinus.
- † Ego Petrus Episcopus Portuen, Card: Ottobonus.
- † Ego Thomas Episcopus Pranestinus, Card: Ruffius.
- † Ego Ludovicus Episcopus Albanen: Card: Picus.
- † Ego Petrus Episcopus Tusculanus, Card: Corradinus.
- † Ego Joannes Antonius Tit: S. Laurentii in Lucina Cardinalis de Via.
- † Ego Antonius Felix Tit. S. Praxedis Presbyter Cardinalis Zondadari.
- † Ego Georgius Tit. S. Maria in trans Tyberim Card: Spinula.
- † Ego Ludovicus Tit. S. Prisca Cardinalis Belluga.
- † Ego Alvarus Tit. S. Bartholomaei in Insula Cardinalis Cienfuegos.
- † Ego J. B. Tit. S. Matthaei in Merulana Card: de Alteriis.
- † Ego Vincentius Tit. S. Petri ad Vincula Presbyter Card: Petra Major Penitentiarius.
- † Ego Nicolaus Maria Tit. SS. Joannis & Pauli Card: Lercari.
- † Ego Franciscus Antonius Tit. S. Sixti Presb. Card: Finus.
- † Ego Fr. Vincentius Ludovicus Tit. S. Pancratii Presb. Card. Gotti Ordinis Pradicatorum.

† Ego

- † Ego D. Leander Tit. S. Callisti Presb. Card: de Porzia.
 † Ego P. Aloysius Carafa Card. Tit. S. Laurentii in Pane & Perna.
 † Ego Franciscus Burgheſius Card. Tit. S. Silveſtri in Capite.
 † Ego Vincentius Tit. S. Petri in Monte Aureo Presbyter Card:
 Bichius.
 † Ego Joſeph Tit. S. Thomæ in Parione Presb. Card. Firrao.
 † Ego Ant. Tit. S. Stephani in Monte Celio Presb. Card: Gentili.
 † Ego Fr. Jo. A. Card: Guadagni Tit. SS. Silveſtri & Martini
 ad Montes.
 † Ego T. Card: de Acquaviva Tit. Sanctæ Ceciliæ.
 † Ego Dominicus SS. Quirici & Julitta Presb. Card. Riviera-
 † Ego Marcellus Tit. S. Mariæ in Ara Cœli Presb. Card. Paſſari.
 † Ego Petrus Card: Aldrovandus Tit. S. Eusebii.
 † Ego Fr. P. M. Tit. S. Joannis ante Portam Latinam Card: Pieri.
 † Ego Joſephus Tit. Sanctæ Pudentianæ Presb: Card: Spinellus.
 † Ego L. S. Mariæ in Via Lata Prior Diaconorum Card. de Alteriis.
 † Ego Carolus S. Agathæ in Suburra Diaconus Card. Columna.
 † Ego Fabius SS. Viti & Modeſti Diaconus Card: Oliverius.
 † Ego Alexander S. Mariæ in Coſmedin. Diac: Card: Albanus.
 † Ego Nicolaus S. Mariæ ad Martyres Diac: Card: Judice.
 † Ego Nerius S. Eustachii Diaconus Cardinalis Corſinus.
 † Ego B. SS. Coſmæ & Damiani Diaconus Ruſſolus.

Locus  Plumbi.

Antonius Card. Prodatarius.

F. Cardinalis Oliverius.

VISA DE CURIA

N. Anronellus.

J. B. Eugenius.

Registrata in Secretaria Brevium.

Locus  Sigilli.

Ita est, Basilius Quintilius Curia Eminentissimi & Reverendissimi
 D. Cardinalis Alma Urbis Vicarii Notarius publicus in fidem.

Retro

Retrō impressam Copiam, ex sua respectivè Exemplari Authentico, Romæ Typis impresso, subscripto, & Sigillō Culiculari communitō, exemplificatam, & reimpressam, collationatam, & in nonnullis locis, in quibus aliqui errores Typi fuerant deprehensi, correctam; cum prædicto suo Exemplari Authentico Romano concordare attestor. In Cujus rei fidem præsentem subscripsi, & Sigillō Illustrissimi ac Reverendissimi D. PETRI FRANCISCI GIANNINI, Utriusq; Juris DOCTORIS, PROTONOTARIJ Apostolici, Auditoris Generalis, & Administratoris Nunciaturæ Apostolicæ in Regno Poloniae &c. communivi Varsaviæ, hac die decimâ quartâ Mensis Junij. Annō Domini 1738.



STEPHANVS SKWARCZYNSKI,
Publicus Sacrâ Authoritate Apostolicâ Notarius, ac Nunciaturæ Apostolicæ Supremæ Actorum Cancellarius.

mpp.

X(10)X
M I C H A E L
DE GRANOW
W O D Z I C K I,

**DECANVS, VICARIVS in Spiritualibus, & OF-
FICIALIS Generalis Cracoviensis, ABBAS**
Commendatarius Wachocensis.

U*Niuerſis & Singulis, quorum intereſt, intererit, aut quomodo-
libet intereſſe poterit, Significamus, & ad Notitiam indubi-
tatam deducimus. Quia Nos introſcriptum Exemplar, Varſavia in
Sacra Nunciatura reuiſum, & Legalifatum recognouimus, & admi-
ſimus, facultatemq; illud pro hac Diœceſi Cracoviensi reimprimen-
di ac publicandi, conceſſimus. In quorum fidem &c. Datum Cra-
covia Die 9. Menſis Auguſti Annô Domini 1738.*

(L.S.)

GASPAR SZCZEPKOWSKI,
CANONICVS Cracoviensis,
I V D E X Surrogatus.

mpp.

W. O. L. A. E. L.

W. O. L. A. E. L.

W. O. L. A. E. L.

W. O. L. A. E. L.

W. O. L. A. E. L.

W. O. L. A. E. L.


W. O. L. A. E. L.

W. O. L. A. E. L.

W. O. L. A. E. L.

W. O. L. A. E. L.

W. O. L. A. E. L.



3. 35

XIV

Biblioteka Jagiellońska



star0026070

